

**Defisit fiskal sejak 1990-an, tidak halang negara membangun, kata Najib**  
**Malaysian Insider**  
**1 Apr, 2014**  
**Oleh Hasbullah Awang Chik**

Datuk Seri Najib Razak (gambar) hari ini menegaskan defisit fiskal bukanlah sesuatu perkara yang baru dan negara mula mengalaminya sejak 1990-an lagi.

Perdana menteri berkata, kerajaan sentiasa memastikan kewangan negara berdaya tahan untuk menghadapi sebarang krisis ekonomi pada masa hadapan.

“Ini kerana apabila hutang negara terkawal, ia akan memberi keyakinan kepada pelabur untuk terus melabur di negara kita. Perlu diketahui, defisit fiskal bukannya satu perkara yang tidak baik.

“Kedudukan fiskal negara berada pada tahap defisit sejak akhir tahun 1990-an dan keadaan ini tidak menghalang negara daripada terus membangun,” katanya ketika menjawab pertanyaan lisan Ahli Parlimen Jasin, Datuk Ahmad Hamzah di Parlimen hari ini.

Najib berkata, perbelanjaan subsidi semasa RM43 bilion tidak seimbang dengan bajet pembangunan tahunan negara kira-kira RM46 bilion yang juga dilihat tidak rasional.

Katanya, rasionalisasi subsidi yang dilakukan kerajaan sekarang akan memberi fokus kepada kumpulan berpendapatan rendah bagi melindungi mereka terbeban dengan kenaikan inflasi.

“Apabila kami melaksanakan rasionalisasi subsidi, kita boleh menjimatkan perbelanjaan kerajaan untuk membangunkan masyarakat juga penambahan bajet pembangunan,” katanya.

Ahli parlimen Ipoh Barat, M Kulasegaran pula membangkitkan isu cabaran terbesar kerajaan adalah mengatasi ketirisan terutamanya dalam perjanjian yang merugikan serta pemberian subsidi yang tidak sewajarnya.

Najib berkata, perkara itu memang menjadi perhatiannya apabila kerajaan menggunakan konsep pengurusan berasaskan nilai bagi projek bernilai melebihi RM100 juta.

Katanya, kontrak juga diberikan berdasarkan tender.

“Malah dalam tender terhad, kosnya mesti diterima kerajaan dan bukan secara automatik.

“Ini dapat memastikan ketirisan dapat diatasi dalam perbelanjaan kerajaan,” katanya. – 1 April, 2014.

Hakcipta © 2014 The Malaysian Insider

Source: <http://www.themalaysianinsider.com/bahasa/article/defisit-fiskal-sejak-1990-an-tidak-halang-negara-membangun-kata-najib>